

Komunikadu Imprensa
18 Jullu 2022
Parlamentu Nasional

JSMP konsidera Autoridade Inspesaun no Fiskalizasaun Atividade Ekonómika, Sanitária no Alimentár (AIFAESA) viola prinsípiu normativa sira Dekretu-Lei Nú. 26/2016

Iha reuniaun plenaria Parlamentu Nasional, 12 Jullu 2022, deputadu sira foti kestaun kona-ba kompaňia Bobolai, Bobonaro fahe produtu Sesta Bázika iha suku Ritabou ho kondisaun sasan siraaat hotu ona ka laiha kualidade.

Iha distribuisaun sasan sira Sesta Bázika nian ne'e, AIFAESA mós halo monitorizaun direta. Informasaun ne'ebé deputadu sira hetan mak ekipa AIFAESA bainhira hetan ka deskobre katak sasan sira ne'e laiha kualidade ka laiha kondisaun ba asegura seguransa alimentár, ekipa la rejista kazu ne'e hodi halo inspesaun no foti asaun ruma tuir knaar no kompeténsia ne'ebé lei atribui, maibé konsola fali komunidade sira katak "*imi simu de'it ona, se la simu entaun kompania sira sei la mai fahe tan ona*". AIFAESA enkoraja no obriga komunidade sira atu simu de'it hahan sira ne'ebé laiha kualidade ka aat hodi konsumu ne'ebé risku ba saúde komunidade sira-nian.

"JSMP hanoin no konsidera atuasaun ekipa AIFAESA nian ne'e la loos no viola ona prinsípiu normativa no misaun AIFAESA nian rasik ne'ebé prevee iha provizaun Artigu 3 Dekretu-Lei Nú. 26/2016 katak AIFAESA nia misaun mak atu halo kontrolu ba kualidade alimentár ka hahan sira hodi bele elimina, diminui ka prevene risku ba saúde pùblika. Nune'e mós la kumpri ka halo tuir atribuisaun no kompeténsia sira ne'ebé prevee iha provizaun Artigu 5 no 6 Dekretu-Lei Nú. 26/2016 ne'ebé katak AIFAESA iha kompeténsia hodi verifika produtu alimentár sira nia kualidade tenke kumpri lei bainhira koloka ba konsumu pùbliku," dehan Diretora Ezekutiva JSMP, Sra. Ana Paula Marçal.

Governu Timor-Leste harii AIFAESA hodi realiza política promosaun ba seguransa alimentár, saúde no iejéniku pùbliku nian. Nune'e, Dekretu-Lei Nú. 26/2016 atribui knaar no kompetensia ne'ebé boot tebes ba instituisaun ne'e.

Tanba ne'e, JSMP espera katak AIFAESA presiza kapasita nia funzionáriu sira atu hatene didi'ak sira nia knaar no responsabilidade hodi bele halo defeza ba konsumidór sira nia direitu atu hetan hahan ka produtu ne'ebé iha kualidade dí'ak no iejéniku.

Atu hetan infomasaun kompletu bele kontaktu :

Ana Paula Marçal
Diretora Ezekutiva JSMP
Email: ana@jsmp.tl
website: <https://jsmp.tl/>